



## 長嫂如母

阿嫂係吾第二個阿姆。二十一歲，毋驚死个佢，對隔壁莊單蘭嫁入吾劉屋，手尖腳幼个佢，嬌嬌女毋做，一下斯擎人一家屋个飯碗，搵人安做大嫂个重擔，實在斯無恁該嘎。該當時个佢，目汁毋知流撇幾多哩！

自係知人我以來，吾屋家个環境斯無已鬆湧。著个衫，毋係拈人著過个，斯係改了又改个大人衫褲，長年透天單淨過年正有新衫好著。講佢新衫，有罅冤枉，係黃卡其衫得哦！過年斯著核該身滿哪去，一著斯歸禮拜毋盼得洗。有阿嫂了，第一擺過年有無共樣个新衫好著，久久都記得該領藍色个高領胖線衫，係仰脣个靚，仰脣个燒暖。該當時个暢，到今恁起來心肝頭還甜滋滋。有阿嫂个寒天，係燒暖个，咖啡色个大襖，合身又好看，少女个夢斯因在該幼幼个絨毛肚，到出社會自家會賺錢咧，還毋盼得擲撇佢！

一日到暗阿姆無閒厥小生理，阿嫂係阿姆乜係阿姊，跔佢轉妹家，跔佢買菜、遶街路……。厥个溫柔係火灰性个阿姆無个，兩子姑嘍嘍嘍，對後生嘍到今。親戚朋友輒輒會講、會問吾兩儕感情做麼會恁好，乜可能係長在黏共下个關係，面相嘎略略會相像。如今阿嫂也有年紀咧，厥一生人斯像顛倒嚙个甘蔗樣，緊來緊甜。嫁來吾劉屋，無財無產，家娘守寡性體烈，老公長年駛自家買个十輪牯，東西南北載貨，逐日佢打早斯愛跔床款一屋人个食著，早朝、飯包搵煞，一大面盆个衫褲等在該愛洗。該油埕埕个打鐵褲，有老公个，有阿叔个，較鑪都毋會淨。幾下竹篙个衫褲晾煞，入屋，斯趕去買菜，煮當晝，歸日像極樂个樣迂迂轉。有細人了，衰過正得，連眠下當晝个權利都無咧！到今佢還會講：恁著該當時二十零歲个自家，實在毋係普通个慶哦！

過後吾姪一個一個出世，半生人佢跔吾哥食苦多過享受，也使得講毋識有享受著。阿哥創事業開工廠該恁多年，銀行貸款个利子，斯靠佢大麵一碗一碗緊搵，恁泥緊還。過後係有自家个家庭咧，三不二時歸家屋還帶轉去攏佢，食毋使錢个大麵、雞肉飯……。印象中係面皮皮，毋過佢自從都毋識分佢歪目色，老公在厥屋背種蘭花，十日有九日乜畀畜，這下恁起來有罅見笑！嫂啊，妳做麼个毋識同佢計較呢？到今係扳一埕都毋曉打，粽一粒都毋會爛，買衫褲無妳斯毋敢大出手，係毋係乜愛怪妳呢？

阿姆無在咧，到佢斷氣前，厥个滿意，係知得，妳係吾嫂乜係吾姆，一生人有妳恁泥个好緣分，係吾个福氣，淦淦个祝福，望妳身體康健，福蔭俵妹。

作者：劉玉蕉

### ☆詞彙學習☆

- |                             |                                  |
|-----------------------------|----------------------------------|
| 【單蘭】daˊ lanˊ：苗栗縣卓蘭鎮的老地名。    | 【十輪牯】shibˊ lienˊ guˊ：大卡車。        |
| 【嬌嬌女】giau+ giau+ ngˊ：千金大小姐。 | 【油埕埕】rhiuˊ deˊ deˊ：油膩膩。          |
| 【擎】kiaˊ：此處是捧、端之意。           | 【打鐵褲】daˊ tiedˊ kuˊ：牛仔褲。          |
| 【該嘎】goi+ saˊ：簡單；容易。         | 【衰過正得】coi+ goˊ zhang+ dedˊ：真是可憐。 |
| 【鬆湧】sung+ rhungˊ：手頭寬鬆；生活優渥。 | 【眠下】minˊ haˊ：稍事休息。               |
| 【幼幼个】rhiuˊ rhiuˊ gai+：細細的。  | 【歪目色】vai+ mugˊ sedˊ：擺臉色。         |